



25. september 2019

UKA 2019/174

Inatsisartut sulerasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

Peqqinnissaqarfipput naalagaaffimmut utertinneqassappat suut periarfissaanersut kiisalu pitsaaqutaasinnaasut suullu ajoqutaasinnaanersut pillugit apeqquteqaat aallaavigalugu oqallisissiassatut siunnersuut.

(Atassutip inatsisartuni ilaasortaaitai)

Peqqinnissaqarfipput artorsarpoq. Nutaarsiassaangilaq, aamma tamavitta misigereerparput peqqiillortilluta nakorsiariaraluartarneq, piumaffigineqaannartarpugulli nipaallisaatitulaaginnassasugut. Ajoraluartumik qularnanngitsumillu allaat aamma inuit inuunerannik naleqartarsimassalluni.

Kalaallit namminiilivikkiartornissatsinnut amerlanerussusillit siunertaqarput, pissusissamisuuginnartutullu isigineqartarluni naalagaaffinngoriartuaarnermut atatillugu oqartussaaffinnik tigusiartuaarneq. Soorlu siornatigut peqqinnissaqarfik nammineerluta angerlaassimagipput nammineerluta aqukkumallugu aningaasartuutigiumallugulu. Sulilu angerlaassuinissatsinnik siunnerfeqarluta, naak massakut oqartussaaffigeriikkavut artorsartut.

Inuup peroriartortup imminullu napatissinnaajumasup nammineq akisussaaffinnik tigusiartuaarnera pissusissamisoorpoq, ineriartorerullu ilagiinnarlugu. Inulli, inuiaallu akisussaassusillit, nunamilu politikkerit oqartussaasut nassuersinnaasariaqarput. Aap, kukkusimavugut, immitsinnut artukkersimagutta iliuuseqartariaqarpugut. Aatsaat toquliivissortilluta nakorsiarsinnaasarnianngilagut.

Misilittagaqanngilagut oqartussaaffimmik naalagaaffimmut utertitsinermik. Tamaammallu isumaqarpugut uagut nunatsinni politikkeriusugut ammasumik eqqartortariaqaleripput suut pitsaaqutaasinnaanersut, suullu ajoqutaasinnaanersut oqallisigissallugit, nunatsinni peqqinnissaqarfik Danmarkimut utertsinneqassappat. Oqartoqassajunnarsivoq akisussaaffimmik qimarratiginninnerusoq utertitsiniaanermik oqariartuuteqaraanni. Nassuersinnaaneq qimarratiginninnerunngilaq, peqqinnissamik salliussineq qimarratiginninnerunngilaq. Oqartoqarsinnaavorli massakutut ingerlaannarutta akisussaaffimmik pingaarnerpaamik qimarratiginninnerusoq.

Nassuersinnaaneq nukiuvoq artornarsinnaasoq. Nakimaatsuuneq, ineriartorusunneq, nunamullu asanninneq, nammineerusunneq, imminut pilersorsinnaaneq napatissinnaanerlu pingaarluinnarput.



Taakkuli qaqumulluunniit inuit peqqissusaannik tunulliussissutaanngisaannassapput. Inuk qitiutillugu suligutta, inuiaat nunalu peqqissumik ineriartortikkumaaratsigit.

Namminiilivikkusukkaannilu suna pingaarnera? Nuna tuaviinnaq namminiilivissimalluni innuttaasullu peqqiilliortut? Immaqaluunniit innuttaasut nukittuut peqqissullu nunaminni namminiilivinnissap tungaanut sulisut?